

POPERA GA PIRIPUWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Piripuwa yexmagüxü

¹ Pa Toeneëgü ya Piripuwa Ngëxmagüxex, choma i Pauru rü namaã i taeneë i Timutéu nixi i pexcèx tanaxümatüxü i ñaã popera. Rü toma rü Ngechuchu ya Cristuarü puracütanüxü tixigü. Rü pexcèx tanaxümatü i pema i yaxögüxüärü äëxgacügü na pixigüxü, rü pema i tupaucawa ngüxëetaeruügü na pixigüxü, rü guxãma i pema i Ngechuchu ya Cristuaxü yaxögüxe. ² Rü chanaxwëxe i Tanatü ya Tupana rü törü Cori ya Ngechuchu ya Cristu poraãcü pexü narüngüxëë rü pexü nataãxëë.

Pauru rü yema yaxögüxüçèx nayümüxë

³ Rü guxüguma i ngëxguma pexna chacuèxãchigu rü Tupanana moxë chaxã i pexcèx. ⁴ Rü ngëxguma chayümüxëgux, rü guxüguma chataãëacüma pexcèx chayümüxë i guxãma i pemax. ⁵ Erü pema rü noxritama Tupanaärü orexü pexinüëgumama rü poraãcü choxü perüngüxëë na nüxü chixuxüçèx i norü ore i mexü. Rü ñuxma rü ta choxü perüngüxëëgüecha. ⁶ Rü Tupana rü marü inanaxügü i wüxi i mexü i puracü i perü maxüwa. Rü nüxü chacuèx rü nüma rü guxügutáma nanaxüecha i ngëma puracü ñuxmatáta yangüxëëã

i ngēxguma ínanguxgu ya Ngechuchu ya Cristu. ⁷ Rū aixcūma name na ngēmaācū pemaã nagu charūxínūxŭ, erū poraācū pexŭ changechaŭ rŭ aixcūma Tupana wūxigu tūxŭ narüngŭxēē i guxāma i yixema. Rū woo ñuxma na chapoxcuxŭ rŭ éxna ega āēxgacügüpēxewa choxŭ nagagügu, rŭ Tupana choxŭ narüngŭxēē i ngēxguma norū ore i mexŭetüwa chideaxgu rŭ namaã nüxŭ chixuxgu i āēxgacügü na aixcūma yīixŭ i ngēma orewa nüxŭ iyarüngauxŭ i tórü maxŭ i taguma gúxŭ. Rū nüxŭ chacuèx rŭ ngēma choxŭ nangŭxēēxŭācūma, rŭ pexŭ rŭ ta narüngŭxēē. ⁸ Rū Tupana nüxŭ nacuèx na ñuxācū poraācū pexŭ chadauxchaŭxŭ rŭ pexŭ na changechaŭxŭ i guxāma i pemax, ngēma Ngechuchu ya Cristu pexŭ na ngechaŭxŭrŭ. ⁹ Rū chorü yumüxēwa naxcèx íchaca na yexeraācū pegü pengechaŭgŭxŭcèx rŭ Tupanaxŭ pengechaŭgŭxŭcèx. Rū naxcèx íchaca na yexeraācū nüxŭ pecuáxŭcèx i guxŭma i Tupanachiga rŭ yexeraācū nüxŭ pecuáxŭcèx na ñuxācū nanaxwèxexŭ na naxcèx pemaxēxŭ. ¹⁰ Rū ngēmaācū pexcèx chayumüxē erü chanaxwèxe na meã penangugŭxŭ i tacü nixŭ i aixcūma mexŭ i Tupanapēxewa na penaxŭxŭcèx i ngēma. Rū chanaxwèxe na aixcūma namexŭ i perü maxŭ na taxucèxma tacücèx Tupana pexna çaxŭcèx i ngēxguma ínanguxgu ya Cristu. ¹¹ Rū naxcèx íchaca na Ngechuchu ya Cristu pexŭ narüngŭxēēxŭ na aixcūma namexŭcèx i perü maxŭ rŭ aixcūma penaxŭxŭcèx i ngēma Tupanapēxewa mexŭ na ngēmaācū meã pemaxēācūma Tupanaxŭ picuèxŭügŭxŭcèx.

*Chauxcèx rü Cristuarü ngúchaŭ na chaxüxcèx
nixĩ i chamaxüxü*

¹² Pa Chaueneëgüx, rü chanaxwèxe i nüxü pecuèx rü guxüma i ngëma choxü üpetüxü, rü aixcüma ngëmaäcü choxü naxüpetü na yexeraäcü natachigaxüxcèx i Tupanaärü ore i mexü. ¹³ Rü ñuxma i núma rü guxüma i churaragü i äëxgacüpataarü dauruügu rü guxüma i togü rü ta nüxü nacuèxgü na chapoxcuxü naxcèx na Cristuarü duüxü chiixü. ¹⁴ Rü ñuxma na chapoxcuxü rü muxüma i taeneëgü i yaxögüxü rü tama namuëëäcüma nüxü nangúchaŭ na nüxü yaxugüexü i Tupanaärü ore i mexü. Rü yexeraäcü tórü Coriaxü nayaxögü. ¹⁵ Rü aixcüma nixĩ i ñuxre i duüxügu rü togüxü na yaxäüxächixëëxüxcèxmare nüxü nixugüexü i Cristuchiga, erü togüxü narüyexerachaŭ. Natürü nangëxma i togü i duüxügu i aixcüma mexügu naxĩnüëäcüma meã nüxü ixugüexü i ngëma ore. ¹⁶ Rü ñuxre i duüxügu rü Cristuchigaxü nixugüe erü choxü nangechaügu rü nüxü nacuèxgü na Tupana nuxma choxü muxü na íchanapoxüxcèx i norü ore i mexü. ¹⁷ Natürü nangëxma i togü i noxrütama ngúchaüxcèx daugüxü rü ngëmacèx nüxü ixugüexü i ngëma ore. Rü nümagü rü tama mexügu narüxĩnüë, natürü naxcèx nadaugü na yexeraäcü choxü naguxchaxëëgüãxü i ñuxma na chapoxcuxü. ¹⁸⁻¹⁹ Natürü nüetama nixĩ ega woo ngëmaäcü yixígu. Erü woo mexü i norü ngúchaümaã yixígu rü ëxna tama, natürü Cristuchigaxü nixugüe. Rü ngëma rü wüxi i taãë nixĩ i chauxcèx. Rü guxügutáma chataãëëcha erü nüxü chacuèx rü guxüma i

ngẽma rü chorü mexüçèx tá nixĩ erü chauxcèx peyumüxëgü rü choxü narüngüxëẽ i Tupanaãẽ i Üünexü i Ngechuchu ya Cristuxü rüngüxëẽxü. ²⁰ Rü ngẽma poraãcü chanaxwèxexü nixĩ na taguma tacü rü chixexü chaxüxü na taxucèxma chaugücèx chaxãnexüçèx. Rü chanaxwèxe i guxüguma íchamemare na guxãpèxewa tama chamuũãcüma Cristuchigaxü chixuxü. Rü ñuxma na chamaxüxü rü woo chayuxgu rü chanaxwae i guxüguma aixrügumarüütama chaugagu Cristuxü nicuèxüügü i duüxügü. ²¹ Erü chauxcèx rü Cristuarü ngúchaũ na chaxüxüçèx nixĩ i na chamaxüxü. Natürü ngëxguma chayuxgux rü ngẽma rü ta name, erü Cristuxütawa tá changëxma i ngëxguma. ²² Natürü tama nüxü chacuèx i tacü nixĩ i rümemaëxü i chauxcèx, ngẽma na chayuxü rü ëxna na chamaxüxü.. Erü ñuxma na chamaxüxü rü choxü natauxcha na chanaxüxü i tórü Coriarü puracü. ²³ Rü ngëmacèx tama nüxü chacuèx na tacü yĩxü i chauxcèx rümemaëxü i ngẽma taxrewa. Erü ñuxguacü rü chanaxwèxe na chayuxü na Cristuxütawa changëxmaxüçèx. Rü ngẽma nixĩ i aixcüma yexera rümemaëxü i chauxcèx. ²⁴ Natürü i pexcèx rü nagu charüxĩnü rü narümemaë nixĩ na ñoma i chaxunemaãtama na chamaxüxü na ngëmaãcü pexü charüngüxëẽxüçèx. ²⁵ Rü ñuxma na aixcüma meã nüxü chacuáxü na pechoxwèxexü, rü ngëmawa nüxü chacuèx na tãütama paxa chayuxü. Rü ngëmaãcü tá chamaxãma na pexü charüngüxëẽxüçèx na yexeraãcü Cristucèx pemaxëxüçèx rü yexeraãcü taãëãcüma nüxü peyaxõgüxüçèx. ²⁶ Rü ngëmaãcü wena táxarü petanüwa changëxma. Rü ngëxguma

wena choxŭ pedaugŭgu rŭ aixcŭma tá petaãĕgŭ erŭ tá pexŭ nangĕxma na tacŭcĕx Ngechuchu ya Cristuxŭ picuĕxŭĭgŭxŭ. ²⁷ Rŭ ngĕma guxŭãrŭ yexera rŭmemaĕxŭ nixĭ na naxcĕx pedauxŭ na meã pemaxĕxŭ, ngĕma Cristuarŭ ore pemaã nŭxŭ ixuxŭrŭŭ. Rŭ ngĕxguma petanŭwa chaxŭxgu rŭ ĕxna woo tama ngĕma chaxŭxgu, natŭrŭ nŭxŭ chaxĭnŭchaŭ na guxãma wŭxigu pegŭ peporaexĕĕxŭ na taguma nŭxŭ perŭçhauxŭcĕx na aixcŭma peyaxŭgŭxŭ, rŭ ngĕmaãcŭ Tupanaãxŭ pepuracŭxŭ na yexeraãcŭ yaxŭchigŭxŭcĕx i norŭ ore i mexŭ. ²⁸ Rŭ ngĕmacĕx penaxwĕxe i tama texĕxŭ pemuŭĕãcŭma nŭxŭ pixugŭama i ngĕma ore. Rŭ ngĕma na tama nŭxŭ pemuŭĕxŭ rŭ ngĕma rŭ wŭxi i cuĕxruŭ tá nixĭ nŭxŭ i perŭ uwanŭgŭ. Rŭ ngĕmawa tá nŭxŭ nacuĕxgŭ na poxcuwa tá naxĭxŭ i nŭmagŭ natŭrŭ pema rŭ tá maxŭwa na pexĭxŭ. Rŭ Tupana tá nixĭ ya pexŭ rŭngŭxĕĕcŭ na tama nŭxŭ pemuŭĕxŭcĕx i ngĕma perŭ uwanŭgŭ. ²⁹ Rŭ Tupanaga nixĭ na Cristuaxŭ peyaxŭgŭxŭ. Rŭ ngĕxgumarŭŭ ta naga nixĭ na Cristucĕx ngŭxŭ pingegŭxŭ. Rŭ ngĕma rŭ wŭxi i ngŭxĕĕ nixĭ i pexna naxãxŭ ya Tupana. ³⁰ Pema rŭ choma rŭ wŭxigu Tupanaãrŭ puracŭwa tangĕxmagŭ, rŭ tanaxŭama i ngĕma puracŭ ega woo texĕ tŭxŭ naguxchaxĕĕgux. Rŭ ŭpa rŭ marŭ choxŭ pedau na ñuxãcŭ meã chanaxŭxŭ i ngĕma puracŭ, rŭ ñuxma rŭ ta nŭxŭ picuãchiga na ñuxãcŭ chanaxŭamaxŭ woo namu i chorŭ guxchaxŭgŭ.

2

Cristu rŭ ñoma taxuŭma yŭxŭrŭŭ nŭgŭ nixĭxĕĕ

*rū yemacèx ga Tupana rū guxũārũ ãĕxgacũxũ
nayaĩxĕẽ*

¹ Rũ dücax, Pa Chaueneĕgũx, rū ñũxma na Cristuarũ duũxũgũ pixĩgũxũ, ĵrũ aıxcũma yĩxũ i nũma pexũ nataãĕxĕxũ? ĵRũ aıxcũma yĩxũ i petaãĕgũxũ erũ nũma pexũ nangechaũ? ĵRũ aıxcũma yĩxũ i Tupanaãĕ i Üünexũ pexũtawa ngĕxmaxũ? ĵRũ aıxcũma yĩxũ i pegũ pengechaũgũxũ rū pegũxũ pengechaũtũmũgũxũ? ² Rũ ngĕxguma chi ngĕmaãcũ yixĩgu, rū chanaxwĕxe i guxãma wũxigu perũxĩnũĕ, rū aıxcũma guxãma pegũ pengechaũgũ, rū aıxcũma guxãma ñoma wũxitama piĩxũrũũ na yĩxũ i peãĕ, rū guxãma wũxitama i ngũchaũcèx pedau. Rũ ngĕxguma ngĕmaãcũ pemaxĕgu rū wũxi i chorũ taãĕ tá nixĩ. ³ Rũ tama name na togũarũ yexera pegũ pixĩgũxĕxũ rū pegũ picuèxũxũgũxũ. Natürũ narũmemae nixĩ i nagu perũxĩnũĕxũ na ngema togũ rū perũ yexera nũxũ nacuègũxũ. ⁴ ĵRũ tama pegũguxicatama perũxĩnũĕ, natürũ pegũ peporaexĕĕ na togũxũ perũngũxĕĕgũxũcèx! ⁵ Rũ name nixĩ ga yema Ngechuchu ya Cristu nagu rũxĩnũxũgu na perũxĩnũĕxũ i pemax. ⁶ Yerũ nũma rū woo ga Tupanaxũchi na yĩxũ, natürũ tama nũgũ nicuèxũxũ na Tupana yixĩxũ. ⁷⁻⁸ Rũ yemacèx yĕma nanatèx ga norũ mexũgũ ga daxũgũxũ ga naãnewa. Rũ wũxi i duũxũ i togũaxũ puracũxũrũũ nũgũ nixĩxĕĕ. Rũ ñoma wũxi i duũxũrũũ ñoma ga naãnegu nabu. Rũ yexguma marũ duũxũ yixĩgu ga nũmax, rū ñoma taxuũma yĩxũrũũ nũgũ nixĩxĕĕ. Rũ Tupanaga naxĩnũ, rū yemaãcũ curuchagu nayu woo wũxi ga ãnexũchi na yĩxũ

ga yema. ⁹ Rū yemacèx ga Tupana rü guxŭétüwa nanangexmaxëẽ rü nayangucuchixëẽ na guxŭma i ãëxgacügüétüwa nangëxmaxŭcèx. ¹⁰ Rū yemaãcü nanaxü ga Tupana na Ngechuchupëxegu tacaxãpŭxügŭxŭcèx rü nüxŭ ticuèxüŭgŭxŭcèx ya guxãma ya texé ya daxŭguxŭ i naãnewa ngëxmagŭxe, rü guxãma i ñoma i naãnewa ngëxmagŭxe, rü guxãma ya texé ya marü yuexe. ¹¹ Rū yemaãcü Tupana ãëxgacŭxŭ nayaxixëẽ na guxãma nüxŭ ixuxŭcèx na tórü Cori yĩxŭ ya Ngechuchu ya Cristu rü ngëmaãcü nüxŭ icuèxüŭgŭxŭcèx ya Tanatü ya Tupana.

Cristuarü duĩxŭgü rü ñoma omügürüŭ nixĩgü i natanüwa i ngëma duĩxŭgü i tama yaxôgŭxŭ

¹² Rū ñuxma na nüxŭ pecuáxŭ na ñuxãcü Nanatüga naxĩnŭxŭ ga Cristu, rü chanaxwèxe i chauga pexĩnüẽ, Pa Chaueneëgü ya Pexŭ Changechaŭgŭxe. Rū yéma petanüwa chayexmagu chauga na pexĩnüëxŭârü yexera chanaxwèxe i chauga pexĩnüẽ i ñuxma na tama petanüwa changëxmaxŭ. Rū chanaxwèxe i Tupanaxŭ pemuëãcüma naxcèx pedaugüama i perü maxŭ i taguma gúxŭ. ¹³ Erü Tupana nixĩ ya perü maxŭwa puracücü na mexŭgu perüxĩnüexŭcèx. Rū nüma nixĩ i pexŭ nangŭxëëxŭ na naga pexĩnüëxŭcèx rü peyanguxëëxŭcèx i ngema norü ngúchaxŭ. ¹⁴ ¡Rü guxŭma i ngema Tupanacèx pexŭxŭwa rü tama name i oöcü penaxü rü pegü naxcèx pechoxŭgagü! ¹⁵⁻¹⁶ Rū name i ngëmaãcü meã pemaxë na taxúema tacü rü chixexŭxŭ pewa iyangauxŭcèx. Rū penaxwèxe i mexŭ i Tupanaxãcügü pixĩgü i natanüwa i ngëma

duŭxŭgŭ i chixexŭ rŭ chixeãĕgŭmarexŭ. Rŭ ngĕxguma ngĕma duŭxŭgŭmaã nŭxŭ pixugŭyane i ngĕma ore i mexŭ i tŭxŭ maxĕxĕĕxŭ, rŭ yoxni natanŭwa rŭ ñoma woramacurigŭ ya ĕãnexŭwa ibáixgŭcŭrŭŭ tá pixĭgŭ. Rŭ ngĕmaãcŭ i ngĕxguma wena núma naxŭxgu ya Cristu rŭ poraãcŭ tá pemaã chataã erŭ tá nŭxŭ chadau na tama natŭcĕxmamare yĭxŭ ga yema puracŭ ga petanŭwa chaxŭxŭ. ¹⁷ Rŭ ngĕma ñŭxma na meã peyaxŭgŭxŭ, rŭ ngĕma nixĭ i perŭ ãmare i Tupanana pexãxŭ. Rŭ ngĕma na meã yanguxŭcĕx i ngĕma perŭ ãmare i Tupanapĕxewa, rŭ choma rŭ íchamemare na Tupanacĕx ichanaxãxŭ i chorŭ maxŭ rŭ chayuxŭ. Rŭ ngĕmacĕx woo chayuxgu rŭ wŭxi i taã tá nixĭ i chauxcĕx. Rŭ chanaxwĕxe i pemagŭ rŭ ta ngĕmacĕx wŭxigu chomaã petaãĕgŭ. ¹⁸ Rŭ ngĕmacĕx ega ngĕma ore i mexŭcĕx chayuxgux, rŭ tama name na pengechaŭgŭxŭ natŭrŭ chanaxwĕxe na wŭxigu chomaã petaãĕgŭxŭ.

Timutéu rŭ Epaporu- dítuchiga

¹⁹ Rŭ ngĕxguma tŕrŭ Cori ya Ngechuchu naxwĕxegu rŭ paxa petanŭwa chanamuega ya taeneĕ ya Timutéu na pexŭ na íyadauxŭcĕx rŭ chataãĕxŭcĕx i ngĕxguma núma nangeãgu i pechiga. ²⁰ Rŭ aixcŭma nataxuma i to i chorŭ ngŭxĕĕruŭ i choma nagu charŭxĭnŭxŭgu rŭxĭnŭxŭ, rŭ Timutéuxicatama nixĭ. Rŭ nataxuma i to i naxrŭŭ aixcŭma pegu rŭxĭnŭxŭ rŭ pexŭ rŭngŭxĕĕchaŭxŭ. ²¹ Erŭ guxŭma i togŭ rŭ naxcĕx nadaugŭ i noxrŭtama ngŭchaŭgŭ, rŭ tama aixcŭma nagu narŭxĭnŭĕ i ngĕma Ngechuchu ya Cristuarŭ ngŭchaŭ. ²² Natŭrŭ i pema rŭ

marü nüxŭ pecuèx na ñuxãcü meã namaxŭxŭ i Timutéu, rü ñuxãcü choxŭ nangŭxëëxŭ i Tupanaãrŭ orearŭ uchigawa, ñoma wŭxi i buxŭ i nanatŭxŭ rŭngŭxëëxŭrŭŭ. ²³ Rŭ ngëmacèx i ngëxguma nüxŭ chacuèxgu na ñuxãcü tá choxŭ na naxŭpetŭxŭ i núma, rŭ ñuxŭchi ngëma petanŭwa chanamuxchaŭ i Timutéu na pexŭ íyadauxŭcèx. ²⁴ Rŭ ngëxgumarŭŭ ta nagu charŭxŭnŭ rŭ tórŭ Cori rŭ aixcŭma tá choxŭ narŭngŭxëë na chomatama ngëma petanŭwa íchayadauxŭcèx. ²⁵ Rŭ ngëxgumarŭŭ ta chauxcèx name nixŭ i ngëma petanŭwa chanamuxŭ i taeneë i Epaporútu. Rŭ nüma nixŭ ga pematama chauxcèx núma penamuxŭ na choxŭ nangŭxëëxŭcèx. Rŭ nüma rŭ chomŭcü nixŭ i Tupanaãrŭ puracŭwa, rŭ poraãcü choxŭ narŭngŭxëë i Tupanaãrŭ orearŭ uwa. ²⁶ Rŭ poraãcü nüxŭ nangŭchaŭ na pexŭ íyadauxŭ i guxãma i pemax. Rŭ poraãcü naxoegaãë, yerŭ pema rŭ nüxŭ pecuáchiga ga na yadaawexŭ ga nümax. ²⁷ Rŭ aixcŭma nixŭ ga na yaðaawexŭ, rŭ wixguxŭchi taèx nayu. Natŭrŭ Tupanaãxŭ nangechaŭtŭmŭŭ rŭ choma rŭ ta nüxŭ changechaŭtŭmŭŭ, rŭ yemacèx naxcèx nayataanexëë na tama yexeraãcü changechaŭxŭcèx. ²⁸ Rŭ ngëmacèx rŭ yexeraãcü chanaxwèxe na paxa petanŭwa chanamuxŭ i Epaporútu, na pema rŭ petaãëgŭxŭcèx i ngëxguma wena nüxŭ pedaugŭgu. Rŭ ngëxguma i choma rŭ tá ta chataãë i ngëxguma nüxŭ chacuèxgu na petanŭwa nangëxmaxŭ na pexŭ nangŭxëëxŭcèx. ²⁹ Rŭ chanaxwèxe i tórŭ Coriéragu petaãëgŭãcüma meã penayaxu erŭ

peeneẽ nixĩ. Rũ name nixĩ i nüxũ pengechaũgũ i guxũma i ngẽma duũxũgũ i Epaporudíturũũ ixĩgũxũ. ³⁰ Yerũ nüma ga Epaporudítu rũ yema na poraãcũ nawa napuracũxũ ga Cristuarũ puracũ, rũ yemacèx wixguxũchi taèx nayu. Rũ ãũcũmaxũwa nügũ nayexmaxẽẽ na pechicũũ choxũ nangũxẽẽxũcèx.

3

Ngẽma na Cristuxũ icuáxũ rũ ngẽma nixĩ i guxũãrũ yexera rũmemaẽxũ

¹ Rũ ñuxma Pa Chaueneẽgũx, rũ chanaxwèxe i petaãẽgũ erũ tórũ Coriarũ duũxũgũ pixĩgũ. Rũ yema ore ga noxri pexcèx chaxũmatũxũ rũ tama choxũ nawèxtũmũũ na wena pexcèx chanaxũmatũxũ erũ aixcũma pexũ name i ngẽma ore. ² ¡Rũ pegũna pedèux nüxna i ngẽma duũxũgũ i chixri maxẽxũ rũ chixexũmaã pexũ ixucuxẽgũxũ! Rũ nümagũ nixĩ i nüxũ yaxugũexũ rũ ngẽxguma tama yigũ íwiewhèxmüpèxechiraũgu, rũ taxucürũwama Tupanapèxewa time. ³ Natürũ yixema aixcũma Tupanapèxewa imexẽ, rũ yixema tixĩgũ. Rũ Tupanaxũ ticuèxũũgũ i Naãe i Üünexũãrũ ngũxẽemaã. Rũ tataãẽgũ erũ Ngechuchu ya Cristuarũ duũxũgũ tixĩgũ. Rũ tama tayaxõgũ na ngẽma yigũ íwiewhèxmüpèxechiraũxũcèx Tupanapèxewa imexũ. ⁴ Rũ choma chi waxi nixĩ i guxũ i togũarũ yexera chayaxõxũ i ngẽma wiechèxmüpèxechiraũchiga. Rũ tataxu chima ya togue ya texé chauxrũũ yaxõxẽ i ngẽmachiga. ⁵ Yerũ yexguma 8 ga ngunexũ chauétũ yixĩgu ga

na chabuxŭ, rŭ choxŭ ínawiechèxmŭpèxechiraŭgŭ, erŭ Yudíu chixĩ. Rŭ Beyamítanŭxŭ chixĩ. Rŭ chaunatŭ rŭ chaué rŭ Yudíugŭ tixígŭ, rŭ ngēmacèx i choma rŭ Yudíuxŭchi chixĩ. Rŭ choma rŭ Parichéuchirèx chixĩ, rŭ pema nŭxŭ pecuèx rŭ ngēma Parichéugŭ rŭ meāma nanaxaure i Tupanaārŭ mugŭ ga Moĩché ũmatŭxŭ. ⁶ Rŭ yema na meā chayanguxèèchaŭxŭcèx ga yema mugŭ ga Moĩché ũmatŭxŭ, rŭ yemacèx nawe chingèchigŭ ga yema duŭxŭgŭ ga Ngechuchuaxŭ yaxŭgŭxŭ. Rŭ yema na aixcŭma meā chanaxaurexŭcèx ga yema mugŭ ga Moĩché ũmatŭxŭ, rŭ yemacèx taxucŭrŭwama texé chauchigaxŭ tixu ga tama na chaxaurexŭ. ⁷ Natŭrŭ guxŭma ga yema ũpa chauxcèx mexŭ, rŭ ñuxma rŭ taxuwama choxŭ name erŭ marŭ íchanatèx na Cristuaxŭxĩcatama chayaxŭxŭcèx. ⁸ Rŭ ñuxma na Ngechuchu ya Cristu ya chorŭ Corixŭ na chacuáxŭ, rŭ chauxcèx rŭ guxŭma ga yema ũpa nagu chixŭxŭ rŭ taxuwama name, erŭ ngēma na Cristuxŭ na chacuáxŭ rŭ guxŭārŭ yexera narŭmemaē. Rŭ guxŭma ga yema mugŭ ga noxri nagu chixŭxŭ rŭ marŭ nŭxŭ charŭxo na Cristuwe charŭxŭxŭcèx. Rŭ chauxcèx rŭ ñoma guxchirerŭŭ nixĩ ga yema ũpa nagu chixŭxŭ ega Cristumaā nŭgŭ chananguxgu. ⁹ Rŭ yemaācŭ nŭxŭ charŭxo ga guxŭma nagagu ga yema na Cristuarŭ duŭxŭ na chiŭxŭcèx. Rŭ ñuxma rŭ Tupanapèxewa chame erŭ Cristuaxŭ chayaxŭ. Rŭ tama ngēma na chamecŭmaxŭcèx rŭ éxna mugŭ chaxaurexŭcèx nixĩ na chamexŭ i napèxewa. Natŭrŭ ngēma na Cristuaxŭ chayaxŭxŭcèx nixĩ i nŭgŭcèx choxŭ namexèèxŭ ya Tupana. ¹⁰⁻¹¹ Rŭ ngēma ñuxma

chanaxwèxexŭ nixĩ na aixcŭma Cristuxŭ chacuáxŭ rŭ chowa na nangēxmaxŭ i ngēma pora ga wena Cristuxŭ írŭdaxēēxŭ i ñŭxma nŭxŭ ngēxmaxŭ. Rŭ yema ngúxŭ na yangexŭ ga nŭma rŭ na nayuxŭ rŭ ngēxgumarŭŭtama chanaxwèxe i íchamemare na naxcèx ngúxŭ chingexŭ rŭ naxcèx chayuxŭ na yixcama choma rŭ ta yuwa ícharŭdaxŭcèx.

Pauru naxcèx nadau na Cristucèx namaxŭxŭ ñŭxmatáta Tupanax-ŭtawa nangu

¹² Rŭ ñŭxma na ngēma ñachaxŭ pemaã rŭ tama chanaxwèxe i nagu perŭxĩnŭē na guxŭxŭ chacuáxŭ i Cristuchiga, rŭ ēxna guxŭwama na chamexŭ. Natŭrŭ guxŭ i ngunexŭgu rŭ naxcèx chadauama na Ngechuchu ya Cristuarŭ ngúchaŭ na chaxŭxŭcèx, yerŭ yemacèx nixĩ ga nŭma ga chauxcèx nadauxŭ ga noxrix. ¹³ Pa Chaueneēgŭx, pemaã nŭxŭ chixu rŭ chomatama meãma nŭxŭ chacuèx rŭ ñŭxma rŭ ta tautama nawa changu i ngēma naxcèx chadauxŭ. Natŭrŭ i ñŭxma rŭ marŭ nŭxŭ icharŭngŭma i guxŭma ga yema noxri nagu chixŭxŭ. Rŭ ñŭxma rŭ chaugŭ chaporaxēē na aixcŭma Cristucèx na chamaxŭxŭ na nawa changuxŭcèx i ngēma maxŭ i chopēxewaama ngēxmaxŭ. ¹⁴ Rŭ ngēmacèx i ñŭxma rŭ naxcèx chadau na aixcŭma Cristucèx chamaxŭxŭ ñŭxmatáta Tupanaxŭtawa changu. Erŭ chanayauxchaŭ i ngēma ãmare i nŭma daxŭguxŭ i naãnewa naxcèx taxcèx nangemaxŭ i yixema na Ngechuchu ya Cristuarŭ duŭxŭgŭ ixŭgŭxŭ. ¹⁵ Rŭ guxãma i yixema na aixcŭma Cristuaxŭ yaxŭgŭxŭ, rŭ name nixĩ i ngēmaãcŭ nagu tarŭxĩnŭē. Natŭrŭ ngēxguma chi texé i petanŭwa toguama tarŭxĩnŭgu, rŭ Tupana tá

tūxū nūxū nacuèxēē i ngēma nūma nanaxwèxexū na nūxū tacuáxū. ¹⁶ Rū ngēma inaxwèxexū nixī na aixcūma naga ixīnūēēchaxū rū meāma nagu ixīxū i ngēma ore i marū nūxū icuáxū. ¹⁷ Pa Chaueneēgūx, chanaxwèxe i chauxrūū nagu pexī i ngēma pexū nūxū chadauxēēxū na namexū. ¡Rū penangugū na ñuxācū meā namaxēxū i ngēma togū i duūxūgū i toma tamaxēxūācūma maxēxū! ¹⁸ Rū marū muēxpūxcūna pemaā nūxū chixu, rū ñuxma rū changechaūācūma rū chaxauxācūma wena pemaā nūxū chixu rū nangēxma i muxūma i duūxūgū i Cristuarū uwanūrūūācūma maxēxū. Rū nūmagū rū tama nūxū nacuèxgūchaū na Cristu curuchagu naxcèx yuxū. ¹⁹ Natūrū ngēma duūxūgū rū tá dūxwa Tupana nanapoxcue. Rū ngēma naxūneārū ngúchaū nixī i namaā natupanaāxū. Rū woo nūxū nacuèxchirēx na wūxi i āne na yīxū i ngēma chixexū natūrū namaā nataēgūama. Rū ñoma i naāneārū ngēmaxūguxicatama narūxīnūē. ²⁰ Natūrū i yixema rū daxūguxū i naānewa tūxū nangēxma i tachica. Rū ítananguxēē na daxūguxū i naānewa taxcèx ne naxūxū ya tórū Cori ya Ngechuchu ya Cristu ya tórū Maxēxēēruū. ²¹ Rū ñāā taxūne i yuxwèxexū rū nūma ya Cristu tá nanaxūchicūū na naxūne i mexēchixūrūū yīxūcèx. Rū ngēma norū pora i namaā guxūetūwa nangēxmaxū, rū ngēmamaātama tá nanaxūchicūū i taxūne na noxrūrūū yīxūcèx.

4

Ñuxma na tórū Coriarū ixīgūxū rū name nixī na guxūguma namaā itaāēgūxū

¹ Pa Chaueneēgūx, rü pexŭ changechaxŭ rü poraãcü pexŭ íchayadauxchaxŭ. Rü ngēma pemaã nüxŭ chixuxŭrüü chanaxwèxe i meã tórü Coricèx pemaxē erü pema nixĩ i chorü taãē rü chorü ãmare i Tupana choxna ãxŭ pixĩgŭxŭ. ² Rü nüxŭ chacèexŭ i taeyèxgŭ i Ebódia rü Chitique na nügümaã nangŭxmüèxŭcèx, erü nümagŭ rü tórü Corixacŭgŭ nixĩgŭ. ³ Rü cumax, Pa Chomücü ya Mecü i Wüxigu Tupanaãrü Puracüwa Chomaã Puracücŭx, rü cuxna naxcèx chaca na nüxŭ curüngŭxèèxŭcèx i ngēma taxre i taeyèxgŭ, erü nümagŭ rü wüxigu chomaã rü Cremetemaã rü ngēma togŭ i chomücŭgŭ i Tupanaãrü poperawa marü ngoxégagŭxŭmaã napuracüe i Tupanaãrü orearü uwa. ⁴ Rü ñuxma na tórü Coriarü pixĩgŭxŭ, Pa Chaueneēgŭx, rü name nixĩ i guxŭguma namaã petaãēgŭ. Rü wena pemaã nüxŭ chixu, rü ¡petaãēgŭ! ⁵ Rü chanaxwèxe i meã pemaxē na guxŭma i duŭxŭgŭ pexŭ nacuèxgŭxŭcèx na aixcüma mexŭ i duŭxŭgŭ na pixĩgŭxŭ. ¡Rü nüxna pecuèxãchie na tórü Cori rü paxa tá nataeguxŭ na núma naxŭxŭ! ⁶ ¡Rü taxucèxma penaxixãchiãēgŭ! ¡Rü Tupanamaã nüxŭ pixu i perü yumüxēwa i guxŭma i tacü i pexŭ ngupetŭxŭ! ¡Rü naxcèx ¡peca rü moxē nüxna pexã! ⁷ Rü ngēmaãcü i nüma ya Tupana rü tá pexŭ nataãèxèè namaã i wüxi i taãē i mexèchixŭ i guxŭma i taãē i nüxŭ icuáxŭãrŭ yexera mexèchixŭ. Rü ñuxma na Ngechuchu ya Cristuarü duŭxŭgŭ pixĩgŭxŭ, rü ngēma taãē i Tupana pexna ãxŭ rü tá nüxna pexŭ ¡napoxŭ i ngēma chixexŭ i nagu perŭxĩnŭèchaxŭ.

Name nixĩ i nagu tarŭxĩnŭē i guxŭma i tacü i

aixcūma mexŭ ixĩxŭ

⁸ Rŭ ñuxma Pa Chaueneĕgŭx, rŭ name nixĩ i nagu perŭxĩnŭē i guxŭma i ngĕma ore i aixcūma ixĩxŭ, rŭ guxŭma i ngĕma nacŭma i taxucŭrŭwama texé chixri nachiga idexaxŭ. Rŭ name nixĩ i nagu perŭxĩnŭē i guxŭma i ngĕma ore i aixcūma meã iwéxŭ rŭ guxŭma i ngĕma Tupanapĕxewa mexŭ, rŭ guxŭma i ngĕma mexŭ i duŭxŭgŭ namaã taãxŭ, rŭ guxŭma i ngĕma mexŭ i Tupanaxŭ naxcèx icuèxŭxŭgŭxŭ. Rŭ name nixĩ i ngĕmagu perŭxĩnŭē. ⁹ Rŭ chanaxwèxe i aixcūma penaxŭ i ngĕma pexŭ changúexĕxŭ, rŭ ngĕma pexŭ namaã chixucŭxĕgŭxŭ, rŭ ngĕma chauxŭtawa nŭxŭ pexĩnŭxŭ, rŭ ngĕma chauxŭtawa nŭxŭ pedauxŭ na chanaxŭxŭ. Rŭ ngĕxguma ngĕmaãcŭ pemaxĕgu rŭ pemaã tá inarŭxãŭx ya Tupana ya tamaã irŭngŭxmŭcŭ rŭ tŭxŭ taãxĕĕcŭ.

Yema PiripucŭĀx ga yaxōgŭxŭ rŭ dĕrumaã Pauruxŭ narŭngŭxĕĕgŭ

¹⁰ Rŭ ñuxma na chorŭ Coriarŭ chiĩxŭ, rŭ poraãcŭ chataãĕ erŭ wenaxãrŭ choxna pecuèxãchie rŭ choxŭ perŭngŭxĕĕ. Rŭ choma nŭxŭ chacuèx rŭ pema rŭ guxŭguma choxŭ perŭngŭxĕĕchaŭ, natŭrŭ taguma pexŭ natauxcha ga na penaxŭxŭ ga yema. ¹¹ Rŭ tama ngĕma na tacŭ choxŭ taxuxŭcèx nixĩ i pemaã nŭxŭ chixuxŭ i ngĕmachiga. Erŭ choma rŭ marŭ chomaã nixŭ na namaã chataãxŭ i ngĕma choxŭ ngĕxmaxŭ. ¹² Rŭ nŭxŭ chacuèx na ñuxãcŭ na yĩxŭ ega guxŭ choxŭ tauxgux, rŭ nŭxŭ chacuèx na ñuxãcŭ na yĩxŭ ega choxŭ namuxŭchixgu. Rŭ marŭ chomaã nixŭ na namaã chataãxŭ i ngĕma choxŭ ngĕxmaxŭ woo changaxpŭtŭwegu,

rū ěxna woo chataiyaxgu, rū ěxna woo choxŭ namuxŭchixgu rū ěxna woo choxŭ natauxguma. ¹³ Rŭ Cristu nixĩ ya choxŭ poraxĕĕcŭ, rū ngĕmacĕx chomaã nanguxŭ na chanaxŭxŭ i guxŭma i ngĕma Tupana naxwĕxexŭ na chanaxŭxŭ. ¹⁴ Natŭrŭ ga pema rū wŭxi ga mexŭ choxŭ pexŭgŭ ga yexguma guxchaxŭwa chayexmagu rū choxŭ perŭngŭxĕĕ. ¹⁵ Rŭ pema, Pa Yaxŏgŭxŭ i PiripucŭĀx, rū meãma nŭxŭ pecuĕx rū yexguma noxri Machedŏniãnewa nŭxŭ chixuxgu ga Tupanaãrŭ ore, rū yexguma yĕma íchaxŭxŭgu, rū pexicatama nixĩ ga ãmare choxna pexãxŭ naxcĕx ga yema ngŭxĕĕ ga chauxŭtawa peyaxuxŭ. ¹⁶ Rŭ yexguma Techarŏnicaarŭ iãnewa chayexmayane, rū pema rū yĕma chauxcĕx penamugŭ ga perŭ ãmare na choxŭ perŭngŭxĕĕgŭxŭcĕx. Rŭ tama nixĩ ga yexgumaríca choxŭ perŭngŭxĕĕxŭ. ¹⁷ Rŭ woo perŭ ãmaremaã chataãĕ, natŭrŭ yexeraãcŭ chataãĕ erŭ ngĕma choxŭ na perŭngŭxĕĕgŭxŭcĕx rū Tupana tá ãmare pexna naxã. ¹⁸ Rŭ ñuxma rū marŭ choxŭ nangĕxma i guxŭma i tacŭ i chanaxwĕxexŭ, rū aixcŭma ngĕmaãrŭ yexera choxŭ nangĕxma. Rŭ ñuxma na Eporudítu núma nangexŭ i perŭ ãmare, rū taxuŭma choxŭ nataxu. Rŭ ngĕma perŭ ãmare i chauxcĕx núma pemuxŭ, rū Tupanapĕxewa rū ñoma wŭxi i pumara i yixixŭrŭxŭ nixĩ, rū nŭma rū poraãcŭ namaã nataãĕ. ¹⁹ Rŭ ngĕmacĕx ya chorŭ Tupana rū norŭ ngĕmaxŭgŭ i mexĕchixŭwa tá pexna nanaxã i guxŭma i tacŭ i pexŭ taxuxŭ. Rŭ ngĕmaãcŭ tá nanaxŭ erŭ Ngechuchu ya Cristuarŭ duŭxŭgŭ pixĩgŭ. ²⁰ Rŭ name nixĩ i guxŭguma nŭxŭ

ticuèxüügü ya Tanatü ya Tupana. Rü ngēmaācü yī.

Pauru nanaguxēē ga norü popera rü wenaxārü yema duïxügüxü narümoxē

²¹ Rü chanaxwèxe i chauégagu nüxü perümoxëgü i guxüma i taeneëgü i Ngechuchu ya Cristuaxü yaxõgüxü. Rü ngëxgumarüü ta pexü narümoxëgü i ngēma taeneëgü i chauxütawa ngëxmagüxü. ²² Rü ngëxgumarüü ta pexü narümoxëgü i guxüma i taeneëgü i núma Dumawa ngëxmagüxü. Rü ngēma yexera pexü rümoxëgüxü rü ngēma nixī i taeneëgü i Dumaārü ãëxgacü ya tacüxü-tawa puracüexü. ²³ Rü chanaxwèxe i tórü Cori ya Ngechuchu ya Cristu pexü narüngüxëē i guxāma i pemax. Rü ngēmaācü yī.

Rü nuāma pexna,
Pauru

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

9d5dc22a-30be-5d26-85a9-76047f4c89e6